

大方廣佛華嚴經卷第三

湯三

東晉大三藏佛陀跋陀羅等譯

盧舍那佛品第二之一

爾時諸菩薩衆及一切世界諸王咸作是念
何等是一切諸佛地佛境界佛持佛行佛力

佛無畏佛三昧佛自在佛勝法示現菩提佛

眼耳鼻舌身意諸根佛光明音聲佛智海世

界海衆生海法界方便海佛海波羅蜜海法

門海化身海佛名號海佛壽量海一切菩薩

所修行海發大乘心出生諸波羅蜜願智慧

藏唯願如來慈悲方便發起我心令得開解

時諸菩薩佛神力故一切供養具中出自然

音而說偈言

如來無量曠劫行 自然正覺出世間

於當來世無量劫 身應一切如大雲

斷衆生疑永無餘 出生勝力得解脫

滅除世間無量苦 令一切得正覺樂

無量剎塵諸菩薩 一心合掌觀最勝

隨彼所願諸境界 斷除疑惑開法門

何等一切諸佛地 大聖境界佛護持

佛無上智力無畏 願為佛子平等現

無量如實諸三昧 諸清淨行深妙法

大聖神力無有邊 與大雷雲雨衆生

悉入法王如實趣 於最勝境不退轉

及無量佛諸功德 願起慈悲悉令見

如來眼根無限量 耳鼻舌身亦如是

佛意如實難思議 願令衆生悉知見

佛國土海衆生海 諸法界海調伏海

佛海無量無邊際 願令佛子平等見

波羅蜜海不思議 無上方便法門海

無量無邊法門海 願在道場具足說

爾時世尊知諸菩薩心之所念即於面門及

一一齒間各放佛世界塵數光明所謂寶幢

照光明法界妙音莊嚴光明生樂垂雲光明

佛十種力嚴淨道場光明一切寶炎雲光明

清淨無礙充滿法界光明能成一切世界光

明淨寶金剛日幢光明往詣菩薩大眾光明

演出諸佛語輪光明如是等一一光明各有

佛世界塵數光明以為眷屬一一光明照十

佛土微塵等刹彼諸菩薩見此光已得觀蓮

華藏莊嚴世界海佛神力故於光明中而說

偈言

無量劫海修功德 供養十方一切佛

教化無量眾生海 盧舍那佛成正覺

放大光明照十方 諸毛孔出化身雲

隨眾生器而開化 今得方便清淨道

佛於往昔生死中 調伏一切諸群生

於一念中悉解脫 世雄無量得自在

深心淨信普莊嚴 往修滿足波羅蜜

與諸刹海塵數等 堅固安住一切力

出微妙音遍十方 具足寶智滿衆心

無量方便化衆生 是師子吼寂靜法

人尊如是德無量 應詣供養聽受法

如佛刹等微塵數 最勝諸子詣如來

各雨一切供養具 一心恭敬觀導師

如來所說一語中 演出無邊契經海

於一切衆雨甘露 恭敬往詣兩足尊

三世諸佛無上願 大聖道場分別說

亦非集在一念中 宜速時詣觀最勝

盧舍那佛大智海 光明普照無有量

如實觀察真諦法 普照一切諸法門

爾時蓮華藏莊嚴世界海東次有世界海名
淨蓮華勝光莊嚴中有佛刹名衆寶金剛藏
佛號法水覺虛空法王於彼如來大衆海中
有菩薩名觀勝法妙清淨王爲佛光明所開
發已與世界海塵數菩薩眷屬圍遶來向佛
所充滿十方一切虛空與十種寶色光明華
雲悉皆彌覆充滿虛空十種妙寶須彌山雲
十種日輪雲十種寶華雲十種妙寶樓閣藏
雲十種華樹雲十種妙香現衆色雲十種一
切妙音聲雲如是一切悉皆彌覆充滿虛空
來詣佛所供養恭敬禮拜已在於東方雜華
光藏師子座上結跏趺坐此世界海南次有
世界海名衆寶月光莊嚴藏中有佛刹名無
量光嚴佛號普智光勝須彌山王於彼如來

大衆海中有菩薩名清淨海慧爲佛光明所
開發已與世界海塵數菩薩眷屬圍遶來向
佛所與十種一切妙莊嚴藏衆寶王雲悉皆
彌覆充滿虛空十種普莊嚴寶王雲十種妙
寶藏熾然照明歎佛功德寶王雲十種妙音
充滿讚歎寶王雲十種菩提樹莊嚴道場寶
王雲十種普門光明佛變化寶王雲十種不
壞衆光明示現寶王雲十種香燈照一切刹
充滿寶王雲十種不可思議佛刹如來宮殿
普現寶王雲十種雜寶三世諸佛法身光明
寶王雲悉皆彌覆充滿虛空來詣佛所恭敬
供養禮拜已在於南方青色蓮華師子座上
結跏趺坐此世界海西次有世界海名寶光
樂中有佛刹名一切勝觀佛號香光王功德
寶莊嚴於彼如來大衆海中有菩薩名香炎

平等莊嚴月光爲佛光明所開發已與世界
海塵數菩薩眷屬圍遶來向佛所興十種一
切雜寶香華樓閣雲悉皆彌覆充滿虛空十
種一切色寶王莊嚴樓閣雲十種一切寶幢
香炎樓閣雲十種一切解脫莊嚴樓閣雲十
種一切寶華鬘雲十種一切寶鬘莊嚴寶樓
閣雲十種十方普光明藏照一切莊嚴樓閣
雲十種一切寶莊嚴無量莊嚴悉現樓閣雲
十種普滿莊嚴樓閣雲十種無量華樂雲悉
皆彌覆充滿虛空來詣佛所供養恭敬禮拜
已在於西方金色雜寶莊嚴蓮華藏化師子
座上結跏趺坐此世界海北次有世界海名
瑠璃寶光滿藏中有佛刹名化青蓮華莊嚴
佛號無量智慧音王於彼如來大衆海中有
菩薩名師子光莊嚴爲佛光明所開發已與

世界海塵數菩薩眷屬圍遶來向佛所興十
種一切香雲悉皆彌覆充滿虛空十種一切
青色華雲十種一切妙寶樹雲十種一切諸
雜華雲十種一切寶莊嚴雲十種一切寶雷
音雲十種一切妙音聲雲如是一切悉皆彌
覆充滿虛空來詣佛所供養恭敬禮拜已在
於北方大燈變化師子座上結跏趺坐此世
界海東南方次有世界海名閻浮檀玻璃色
幢中有佛刹名寶莊嚴藏佛號一切法燈無
所怖畏於彼如來大衆海中有菩薩名無盡
勝燈功德法藏爲佛光明所開發已與世界
海塵數菩薩眷屬圍遶來向佛所興十種無
量色蓮華藏師子座雲悉皆彌覆充滿虛空
十種師子座雲十種一切莊嚴具莊嚴師子
座雲十種燈明師子座雲十種能出十方一

切衆寶師子座雲十種一切香鬘師子座雲
十種一切諸佛莊嚴示現師子座雲十種一
切寶臺欄楯莊嚴師子座雲十種一切寶樹
莊嚴師子座雲十種日莊嚴師子座雲皆悉
彌覆充滿虛空來詣佛所供養恭敬禮拜已
在東南方夜光幢寶藏師子座上結跏趺坐
此世界海西南方次有世界海名普照莊嚴
中有佛刹名香勝離垢光明佛號一切衆生
普歡喜王於彼如來大衆海中有菩薩名普
智光明慧燈爲佛光明所開發已與世界海
塵數菩薩眷屬圍遶來向佛所興十種如意
寶王雲悉皆彌覆充滿虛空十種青色寶雲
十種一切香雲十種一切幡雲十種一切妙
色莊嚴雲悉皆彌覆充滿虛空來詣佛所供
養恭敬禮拜已在西南方衆寶師子座上結

跏趺坐此世界海西北方次有世界海名善
光照中有佛刹名意入佛號普門智慧意入
明淨音於彼如來大衆海中有菩薩名無量
華照垂髻爲佛光明所開發已與世界海塵
數菩薩眷屬圍遶來向佛所興十種一切雜
寶輪蓋雲悉皆彌覆充滿虛空十種華蓋雲
十種解脫蓋雲十種寶王蓋雲十種雜寶蓋
雲十種普寶蓋雲十種瑠璃寶王蓋雲十種
一切香蓋雲悉皆彌覆充滿虛空來詣佛所
供養恭敬禮拜已在西北方衆善光明幢師
子座上結跏趺坐此世界海東北方次有世
界海名寶照光明藏中有佛刹名香莊嚴樂
勝藏佛號無量功德海於彼如來大衆海中
有菩薩名無盡清淨光明王爲佛光明所開
發已與世界海塵數菩薩眷屬圍遶來向佛

所興十種一切寶光輪雲悉皆彌覆充滿虛空十種光輪雲十種華雲十種如來變化輪雲十種一切佛境界輪雲十種一切功德寶雲十種一切衆生樂不可盡示現雲十種一切諸佛所願示現雲悉皆彌覆充滿虛空來詣佛所供養恭敬禮拜已在東北方清淨光明不可盡師子座上結跏趺坐此世界海下方次有世界海名蓮華妙香勝藏中有佛刹名寶師子光佛號明照法界於彼如來大衆海中有菩薩名光照分別法界爲佛光明所開發已與世界海塵數菩薩眷屬圍遶來向佛所興十種一切寶光明雲悉皆彌覆充滿虛空十種一切香光明雲十種諸佛師子吼雲十種一切佛刹功德莊嚴雲十種一切華樓閣雲十種一切座莊嚴雲悉皆彌覆充滿

虛空來詣佛所在於下方寶藏師子座上結跏趺坐此世界海上方次有世界海名雜寶光海莊嚴中有佛刹名樂行清淨佛號無礙功德稱離闇光王於彼如來大衆海中有菩薩名無障礙力精進慧爲佛光明所開發已與世界海塵數菩薩眷屬圍遶來向佛所興十種一切無量妙色寶照雲悉皆彌覆充滿虛空十種無量光普照雲十種一切莊嚴照明雲十種香炎雲十種一切莊嚴雲十種佛光炎雲十種寶樹華炎雲十種一切寶樹堅固光明雲十種一切勝光明雲十種一切菩薩所行示現雲十種一切解脫光明雲悉皆彌覆充滿虛空來詣佛所供養恭敬禮拜已在於上方妙音勝蓮華藏師子座上結跏趺坐如是等十億佛刹塵數世界海中有十億

佛刹微塵數等大菩薩來一一菩薩各將一
 佛世界塵數菩薩以為眷屬一一菩薩各與
 一佛世界微塵數等妙莊嚴雲悉皆彌覆充
 滿虛空隨所來方結跏趺坐彼諸菩薩次第
 坐已一切毛孔各出十佛世界微塵數等一
 切妙寶淨光明雲一一光中各出十佛世界
 微塵數菩薩一一菩薩一切法界方便海充
 滿一切微塵數一一塵中有十佛世界塵數
 佛刹一一佛刹中三世諸佛皆悉顯現念念
 中於一一世界各化一佛刹塵數衆生以夢
 自在示現法門教化一切諸天化生法門教
 化一切菩薩行處音聲法門教化振動一切
 佛刹建立諸佛法門教化一切願海法門教
 化一切衆生言詞入佛音聲法門教化一切
 佛法雲雨法門教化法界自在光明法門教

化建立一切大衆海於普賢菩薩法門教化
 以如是等一切法門隨其所樂而教化之於
 一念頃能滅一切世界中各如須彌山塵數
 衆生諸惡道苦各如須彌山塵數衆生令離
 邪定立正定聚各如須彌山塵數衆生令立
 聲聞緣覺地各如須彌山塵數衆生立無上
 道各如須彌山塵數衆生立一切不可盡功
 德智慧地各如須彌山塵數衆生令立盧舍
 那佛願性海中爾時諸菩薩光明中以偈頌
 曰

一切光明出妙音 說諸菩薩具足行
 佛子功德悉成滿 普遍一切十方界
 無量劫海修行道 欲令衆生離苦故
 不自計已生死苦 佛子善入大方便
 無量無邊無有餘 窮盡一切大海劫

遍行一切諸法門	善說微妙寂靜法
一切三世佛所願	皆得清淨具足滿
佛子饒益諸衆生	能自具行清淨道
皆能往詣諸佛所	清淨法身照十方
佛子智海無邊底	普觀諸法寂滅相
一光明中有無量	無上大慈難思議
清淨慧眼照諸法	此是佛子妙境界
一毛悉受諸佛刹	又能振動諸國土
能令衆生無怖想	是名清淨方便地
一一塵中無量身	復現無量莊嚴刹
於一念中皆悉見	是無障礙淨法門
三世所有一切劫	於一念中能悉現
猶如幻化無所有	是名諸佛無礙法
普賢諸行皆具足	能令衆生悉清淨
諸佛子具自在法	一一毛孔師子吼

爾時世尊欲令一切菩薩大衆知佛無量無邊境界自在法門故放眉間白毫相一切寶色燈明雲光名一切菩薩慧光觀察照十方藏此光遍照一切佛刹於一念中皆悉普照一切法界於一切世界兩一切佛諸大願雲顯現普賢菩薩示大衆已還從足下相輪中入於彼復有大蓮華生以衆寶爲莖一切寶王爲莊嚴藏其葉遍覆一切法界一切寶香莊嚴其鬚鬘浮檀金以爲其臺此華生已如來眉間有一大菩薩出名曰一切諸法勝音法三與世界海塵數菩薩衆俱右遶世尊無量而巳退坐蓮華臺上眷屬菩薩坐蓮華鬚一切諸法勝音菩薩成就無量法界歡喜隨順諸佛境界深智度不可思議佛海光明悉能往詣一切佛所爾時一切諸法勝音菩薩以偈

頌曰

佛身充滿諸法界 普現一切衆生前
 應受化器悉充滿 佛故處此菩提樹
 一切佛刹微塵等 爾所佛坐一毛孔
 皆有無量菩薩衆 各爲具說普賢行
 無量刹海處一毛 悉坐菩提蓮華座
 遍滿一切諸法界 一切毛孔自在現
 爾時師子炎光奮迅音菩薩以偈頌曰
 盧舍那如來 轉清淨法輪 一切法方便
 如來雲普覆 十方國土中 一切世界海
 佛願力自在 普現轉法輪 一切佛土中
 無量大衆海 言號各不同 而轉淨法輪
 盧舍那佛神力故 一切刹中轉法輪
 普賢菩薩願音聲 遍滿一切世界海
 法身充滿一切刹 普雨一切諸法雨

法相不生亦不滅 悉照一切諸世間
 無量無數億劫中 一切佛刹微塵道
 盧舍那佛妙音聲 具足演說本所行
 一切佛刹微塵數 大光明網照十方
 一一光中有諸佛 以無上道化衆生
 法身堅固不可壞 充滿一切諸法界
 普能示現諸色身 隨應化導諸群生
 三世無量諸佛刹 其中一切諸導師
 一切音聲及名字 普見諸佛力自在
 過去未來及現在 如是一切諸導師
 彼聖能令一切聞 不可思議正法輪
 如此四天下道場上見佛神力一切菩薩大
 衆雲集一切世界海中亦復如是爾時普賢
 菩薩於如來前坐蓮華藏師子之座即入一
 切如來淨藏三昧正受普照一切法界諸如

來身無所障礙離垢滿足猶如虛空普賢菩薩於此世界三昧正受盡法界虛空界等一切佛刹亦復如是普賢菩薩入是三昧已十方世界海諸佛悉現彼諸如來各各讚言善哉善哉善男子汝乃能入此三昧正受皆是

盧舍那佛本願力故又汝於諸佛所清淨行願力故所謂轉一切諸佛法輪故開一切如來智慧海故盡度一切諸法方便及十方海悉無餘故除一切衆生煩惱得清淨故能到一切諸佛國土無障礙故入一切諸佛境界無礙故一切諸佛普門功德滿足故入一切法方便深樂一切智故方便觀察一切世間法故知一切衆生諸根海故爾時一切諸佛與普賢菩薩入一切智力與入無量無邊法界智與能詣三世諸佛所智與一切世界海

成壞智與入無量衆生界智與佛甚深法門智與一切不壞三昧住智與入一切菩薩諸根海智與一切衆生語言海轉法輪辭辯智與一身遍滿一切世界智與一切諸佛音聲智何以故以得此三昧法故爾時十方諸佛各伸右手摩普賢菩薩頂爾時一切菩薩見十方佛各伸右手摩普賢菩薩頂已彼諸菩薩一心恭敬觀察普賢菩薩即時同聲以偈頌曰

於諸佛所修善法 滿足一切大願力
出生清淨妙法身 如實平等同虛空
一切諸佛國土中 普賢菩薩常依住
十方世界無不見 無量功德智慧海
悉見十方一切佛 清淨身行功德海
能於一一微塵道 普皆示現一切刹

一切十方佛世界 無量微塵諸劫數

常見普賢真佛子 無量三昧方便行

法身充滿諸法界 一切十方佛國土

遍遊一切衆生海 安住深妙清淨法

求度無量諸法界 離衆煩惱不可壞

其身周遍滿虛空 廣說無量諸佛法

一切功德海中生 普放光明如大雲

堅固衆生清淨行 微妙音說佛境界

無量無數大劫中 修習普賢甚深行

無量無邊諸法雲 雷震演說勝法界

一切佛土如實性 十力修習淨莊嚴

普入一切衆生海 如應為說清淨法

無量無邊大衆海 一心恭敬觀普賢

無量深廣智慧海 願轉清淨妙法輪

爾時普賢菩薩承佛神力觀察一切諸世界

海一切衆生海法界業海一切衆生欲樂諸

根海一切三世諸佛海已普告菩薩大衆海

言佛子諸佛一切世界海成敗清淨智不可

思議一切衆生界起智觀察法界智一切如

來自在智清淨願轉法輪智力無所畏不共

法智光明讚歎音聲智三種教化衆生智無

量三昧法門不壞智如來種種自在智如是

等一切皆不可思議我當承佛神力具足演

說欲令一切衆生入佛智海爾時普賢菩薩

從彼三昧起從世界微塵等三昧起念念中

不壞方便智一切三世三昧起時彼一切諸

菩薩衆一一皆得世界塵數諸三昧世界塵

數方便法海方便辯海諸行願海如此會菩

薩所得功德一切世界海一切如來衆海諸

菩薩衆所得功德亦復如是是時一切世界

六種震動一切衆生安隱悅樂一切衆寶種種莊嚴一切如來大衆海中雨十種寶王雲所謂勝金色幢寶王雲佛光明照寶王雲金蓮華寶王雲菩薩辯才光明寶王雲一切妙音衆寶王雲莊嚴佛土道場寶王雲一切菩薩無量功德光明輪妙音寶王雲一切如來毛孔及諸光明以偈頌曰

湯三

十四

普賢悉在一切佛刹坐寶蓮華師子座上如是示現遍一切界普入無量無邊諸行悉能示現無量種身變化充滿十方世界妙音和雅說法無礙一切三昧方便自在一切佛土諸如來所一切三昧皆得自在悉能了知最勝境界示現普賢無量自在如一切土諸如來前一切刹塵諸世界中普賢自在亦復如是盡盧舍那本願底故

普賢身相猶如虛空依於如如不依佛國現身無量普應衆生隨群萌類爲現化故一切世界無量佛土悉能示現入諸法門普賢菩薩具足淨願如是等比無量自在一切衆海無量無邊各於佛土示現清淨

如是一切身中悉現隨其起滅一念悉知爾時普賢菩薩欲令大衆重歡喜故以偈頌曰

湯三

十五

諸佛深智功德海 充滿無量無邊刹
方便隨衆所應見 盧舍那佛轉法輪
不可思議佛刹海 於無量劫令清淨
最勝導師照一切 悉能調伏衆生海
衆生大海難可測 諸佛境界不思議
衆生樂惡著諸見 不能了知無上道
功德法海長養心 常能親近善知識

恒為諸佛所護念 是等能度得上智
 離諸諂曲心清淨 廣大慈悲無邊際
 深心淨信無馱足 彼聞是法喜無量
 普賢菩薩諸地願 安諦善住能順行
 遊心法界如虛空 是人乃知佛境界
 一切菩薩得善利 能見自在最勝尊
 非餘境界之所知 普賢方便皆得入
 無量無邊諸眾生 一切如來所護念
 於一切處轉法輪 盧舍那佛境界力
 一切刹土及諸佛 在我身內無所礙
 我於一切毛孔中 現佛境界諦觀察
 普賢菩薩所願行 無量無邊悉具足
 普眼境界清淨身 我今演說仁諦聽
 爾時普賢菩薩告諸菩薩言佛子世界海有
 十種事去來今佛之所演說所謂說世界海

起具因緣世界海住世界海形世界海體世
 界海莊嚴世界海清淨世界海如來出世世
 界海劫世界海壞方便世界海諸佛子世界
 海有如是等十種事為首乃至有世界海塵
 數種事諸佛子當知一切世界海有世界海
 塵數因緣具故成已成今成當成所謂如來
 神力故法應如是故眾生行業故一切菩薩
 應得無上道故普賢菩薩善根故菩薩嚴淨
 佛土願行解脫自在故如來無上善根依果
 故普賢菩薩自在願力故如是等世界海塵
 數因緣具故一切世界海成爾時普賢菩薩
 以偈頌曰
 佛智境界 不可思議 自在善住 悉皆如是
 無量無邊 諸世界海 盧舍那佛 悉能嚴淨
 如應化度 一切菩薩 無量願海 皆悉清淨

十方佛土一切衆生以不思議而覺悟之
一切菩薩無量自在度一切智方便法門
出生一切無量願海起諸世界猶如虛空
普行一切菩薩善行入佛境界無量無邊
悉能嚴淨十方佛刹一一佛土無量劫行
衆生心境不可思議業能悉起一切刹海
衆生垢穢國不清淨行業無量世界不同
諸佛刹海淨莊嚴藏離垢雜寶以爲校飾
長養無垢弘誓願海佛子能淨無數國土
若有菩薩修普賢行常能履行清淨法界
當知是等功德如佛能出無量如來刹海
於一念中悉遍十方能現一切菩薩所行
甚深清淨猶如虛空等空界者自在如是
一切道場諸如來前坐寶蓮華現衆妙色
於其身內容一切刹又一念中示現三世

入巧方便起諸刹海於三世國示現成佛
盧舍那佛此土清淨衆寶成就無有邊際
爾時普賢菩薩告諸菩薩言佛子一切世界
海所依住如世界微塵數所謂依一切莊嚴
住或依虛空住或依一切寶住或依佛光明
住或依幻業住或依摩訶那伽金剛力士掌
中住或依普賢菩薩願力住是時普賢菩薩
以偈頌曰

無量無邊佛刹海 離垢妙寶以莊嚴
摩尼寶王清淨照 最勝威神靡不見
清淨刹海住虛空 寶王妙藏光普照
暢發無量微妙音 宣揚佛道靡不欣
種種華光善喜樂 如意寶珠爲莊嚴
無量光網彌覆上 種種香雲遍充滿
無量無邊妙蓮華 青瑠璃寶以爲臺

清淨國土甚奇妙	一切諸佛莊嚴故
或有諸佛清淨土	以佛威神得安住
見離垢淨眾妙寶	無量菩薩悉充滿
或有諸佛清淨土	金剛力士掌中住
十方世雄盧舍那	常為一切轉法輪
或依寶樹平正住	依香炎雲亦如是
有依水輪住堅固	或依金剛海座住
有住金剛勝妙幢	種種寶華彌覆上
無量自在一切處	盧舍那佛令眾見
眾雜異色長光明	普流一切佛世界
悉見種種莊嚴藏	離垢微妙甚清淨
彼以一切願海力	無量種種所依住
諸如來雲悉充滿	常依清淨虛空住
或有佛刹處上方	依淨菩薩天冠住
彼現無量佛自在	佛子妙音淨業化

諸法界等佛國土	譬如電光亦如幻
紺瑠璃寶廣清淨	悉從離垢淨業起
普現種種莊嚴藏	依止虛空靜安住
行業境界不可議	佛令眾生普得見
一切塵等諸佛刹	普賢菩薩一念起
無量劫行化眾生	充滿法界現自在
一一微塵中	佛國海安住
彌綸覆一切	於一微塵中
一切微塵中	神變亦如是
盧舍那示現	諸佛及神力
爾時普賢菩薩告諸菩薩言	佛子諸世界海
有種種形或方或圓或非方圓	或如水洄洑
或復如華形或種種眾	生形者爾時普賢菩
薩以偈頌曰	
刹海無有量	殊形異莊嚴
	十方世界海

見諸雜種相 或圓或四方 或復非方圓
三維及八隅 狀若摩尼寶 一切諸業海
種種別異故 有如金剛掌 莊嚴坦平正
鍊真金色 清淨妙形 入於無量 正法之門
諸佛刹海 種種之藏 猶如大雲 懸處虛空
彼寶輪地 妙淨分明 盧舍那佛 光明悉照
諸佛國土 起由心業 無量種形 而以莊嚴
彼國一切 各各自在 如來刹海 現無量相
或有淨穢 苦樂不同 法常流轉 變現如是
一切業海 不可思議 一毛孔中 無量佛刹
莊嚴清淨 曠然安住 彼一切處 盧舍那佛
於衆海中 演說正法 於一塵內 微細國土
一切塵等 悉於中住 一切世界 有種種形
悉於其中 轉尊法輪 是弘誓願 自在之力
一一塵中 現一切刹 譬如幻化 亦如虛空

諸心業力之所莊嚴 一一塵中 衆生數等
諸化佛雲 神力自在 於微塵中 善住佛刹
盧舍那佛 現法如是
爾時普賢菩薩告諸菩薩言 佛子 諸世界海
有種種體 悉應當知 所謂一切寶莊嚴體 或
一寶體 或金剛堅固地體 或衆香體 或日珠
輪體 爾時普賢菩薩以偈頌曰
或有世界海 衆寶所合成 堅固不可壞
安住寶蓮華 或勝光明起 清淨暉炎照
衆妙莊嚴刹 依止虛空住 或有光明刹
依止光明住 光明雲莊嚴 諸菩薩宮殿
或有佛刹海 猶如電光住 言取不可得
斯由願力起 或有摩尼寶 日光明藏照
貫真珠輪地 菩薩悉充滿 或有寶炎刹
光明雲蔭覆 一切寶莊嚴 悉皆有變化

或有衆相體 微妙相莊嚴 間錯雜寶冠

一切佛所化 心海業所起 國土隨樂住

喻如幻無方 皆從妄想生 如來身光明

摩尼刹安住 正覺雲彌覆 一切佛自在

或普賢菩薩 化現佛刹海 一切寶校飾

願力所莊嚴

湯三

二十

爾時普賢菩薩告諸菩薩言佛子諸世界海

有世界海微塵等莊嚴悉應當知所謂一切

境界種種雲莊嚴一切世界衆生行業莊嚴

三世諸佛及普賢菩薩願力莊嚴有如是等

世界海微塵數莊嚴爾時普賢菩薩以偈頌

曰

如世界海微塵等 不可思議業果報

一切十方世界海 種種嚴淨廣無邊

無量淨色普莊嚴 上妙功德常充滿

雜光明雲出梵音 聞于一切諸佛刹

菩薩無量功德海 妙聲遍滿一切刹

諸普願雲具莊嚴 聲震十方世界海

衆生業海廣無際 淨莊嚴雲出妙音

業報如實隨應變 諸佛力故悉周滿

一切三世諸如來 自在普現無量刹

一一境界一切佛 莊嚴刹海皆悉見

過去未來現在劫 一切十方諸世界

於無量劫淨莊嚴 一一佛刹皆悉見

一切境界諸佛雲 數等衆生滿十方

佛自在行令衆知 湯三 是謂如來莊嚴刹

衆香炎流及華流 一切衆寶摩尼流

種種衆妙莊嚴雲 皆悉校飾諸佛刹

十方世界諸道場 一切衆具妙莊嚴

靡不覩見此刹海 猶如空中電光現

普賢菩薩佛子等 悉能莊嚴諸佛刹

衆生等劫淨行海 於此世界悉顯現

爾時普賢菩薩告諸菩薩言佛子當知諸世

界海有世界塵數清淨所謂菩薩親近善知

識成就諸善根等利一切衆生淨滿一切諸

波羅蜜安住一切行地有如是等世界塵數

清淨爾時普賢菩薩以偈頌曰

一切佛刹諸莊嚴 無數願海方便生

一切佛刹清淨色 無量行海所修習

久遠親近善知識 一切淨妙諸業行

慈悲普流潤衆生 是故清淨佛刹海

一切法門三昧地 一切佛所淨德海

禪門方便清淨地 是故嚴淨佛刹海

能起無量清淨心 信佛堅固不可壞

以忍方便淨無垢 莊嚴刹海微妙色

與功德雲滿虛空 利益一切修淨行

衆生普獲無量德 是故嚴淨佛刹海

刹海方便等無量 悉淨諸度無有餘

修無盡願波羅蜜 是故嚴淨佛刹海

幻化行起無有量 一切諸法廣清淨

種種方便淨衆生 起是可樂佛刹海

方便嚴淨一切地 具足諸佛功德海

令諸衆生竭苦源 是故嚴淨佛刹海

修淨力海無與等 能淨一切衆生根

恭敬供養無量佛 是故嚴淨佛刹海

爾時普賢菩薩告諸菩薩言佛子當知一一

世界海有世界海塵數諸佛出興于世所謂

有佛興世色身示現遍滿法界或有短壽或

無量劫如是一一世界海有世界海塵數佛

出興于世爾時普賢菩薩以偈頌曰

佛以無量方便門	能起一切佛刹海
隨順衆生所欲樂	諸佛法王出與世
如來法身不思議	無色無相無倫匹
示現色身為衆生	十方受化靡不見
或為衆生現短命	或現長壽無量劫
法身多門現十方	常為世間良福田
或有能令不思議	十方刹海悉清淨
或有能淨一刹土	是彼方便願所生
或說不可思議乘	佛普示現隨所樂
或有如來說一乘	是佛方便無有量
自然無師得正覺	或有濟度少衆生
或有能於一念中	化度無量衆生海
或有於一毛孔中	化佛雲出不思議
充滿一切十方界	無量方便化衆生
或佛音聲振十方	隨諸衆生所欲樂

無量億劫不斷絕 度衆生海無有邊
 或有無量莊嚴刹 清淨大衆圍遶坐
 充滿一切世界海 佛遍處衆如空雲
 是佛方便不思議 慈海充滿遍一切
 入諸莊嚴方便門 悉現一切衆生前
 爾時普賢菩薩告諸菩薩言佛子當知世界
 海有世界海微塵等劫住所謂佛刹海或住
 不可數劫或住可數劫有如是等世界海微
 塵數劫住
 大方廣佛華嚴經卷第三

音釋

欄 欄郎干切勾欄也 吼 呼后切 沃 房六切 伏
 也 流